



Na osnovu člana 8. stav (3) Zakona o obrtu i srodnim djelatnostima ("Službene novine Federacije BiH", br. 35/09 i 42/11) i člana 4. Uredbe o kriterijima i postupku za ostvarivanje prava na podsticajna sredstva za očuvanje i razvoj tradicionalnih i starih zanata – obrta ("Službene novine Kantona Sarajevo", br. 15/10 i 29/11), Ministarstvo privrede, objavljuje

JAVNI POZIV

za dodjelu podsticajnih sredstava za očuvanje i razvoj tradicionalnih zanata – obrta u 2014. godini

1. Predmet javnog poziva:

Predmet Javnog poziva je prikupljanje zahtjeva zanatlija-obrtnika, koji obavljaju djelatnosti tradicionalnih i starih zanata-obrta, za ostvarivanje novčanih podsticaja iz sredstava tekućih transfera Budžeta Kantona Sarajevo - Ministarstva privrede za 2014. godinu.

2. Pravo učešća:

Pravo učešća po osnovu Javnog poziva imaju obrtnici koji obavljaju stare i tradicionalne zanate - obrte, čije je sjedište obrta i prebivalište u Kantonu Sarajevo, a koji ispunjavaju uslove i kriterije propisane čl. 1. i 2. Uredbe o kriterijima i postupku za ostvarivanje prava na podsticajna sredstva za očuvanje i razvoj tradicionalnih i starih zanata – obrta ("Službene novine Kantona Sarajevo", br. 15/10 i 29/11) (u daljem tekstu Uredba).

3. Opšti kriteriji koje obrtnici treba da ispunjavaju su:

- sjedište obrta na području Kantona Sarajevo,
- obrt se obavlja kao osnovno zanimanje i
- obrt se obavlja pretežnim udjelom ručnog rada, u manjim serijama, pružajući usluge, odnosno stvarajući finalni proizvod tradicionalnog – starog zanata.

4. Posebni kriteriji koje obrtnici treba da ispunjavaju su:

Obrti - zanati koji se obavljaju moraju biti obuhvaćeni Popisom obrta- zanata, koji je sastavni dio Uredbe (poglavlje II., član 2.). Finansijska sredstva, odobrena u skladu sa Uredbom, mogu se koristiti za:

- poboljšanje uslova rada obrtničke radionice,
- troškove vezane za obavljanje učeničke prakse,
- troškove novouposlenih radnika,
- komunalne naknade javnim preduzećima i fondovima,
- zakupnine, za korištenje poslovnog prostora i
- nabavku repromaterijala i slično.



5. Potrebna dokumentacija:

Uz obavezan, popunjen pismeni zahtjev - prijavu na Javni poziv (obrazac zahtjeva - prijave može se preuzeti putem web stranice Ministarstva privrede Kantona Sarajevo ili na protokolu Kantona Sarajevo), obavezno se prilaže sljedeća dokumentacija:

- rješenje nadležnog organa o osnivanju zanatske radnje, odnosno odobrenje o obavljanju zanatske djelatnosti-obrta,
- dokaz o stručnoj osposobljenosti vlasnika ili uposlenika (uz dokument o izvršenoj urednoj prijavi PIO za uposlenika) za obavljanje obrta, a ako nema ovog dokaza iz priloženog rješenja o osnivanju obrta mora biti vidljivo da se registrovana djelatnost obavlja duže od pet godina,
- uvjerenje nadležnog općinskog organa da se obrt obavlja kao osnovno zanimanje i da nije utvrđen trajni prestanak obavljanja registrirane obrtničke djelatnosti,
- original obavještenje MUP KS o evidenciji prebivališta (ne starije od šest mjeseci),
- ugovor o zakupu ili dokument o vlasništvu prostora,
- ugovor o otvorenom računu kod banke (koji se vodi na radnju obrtnika),
- uvjerenje o poreznoj registraciji sa identifikacionim brojem,
- obavještenje Službe za statistiku o razvrstavanju obrta prema djelatnosti i
- svojeručno potpisano i od nadležnog organa ovjerenu izjavu, kojom se potvrđuje da se konkretna zanatska djelatnost obavlja najvećim dijelom ručno i da se na taj način stvara finalni proizvod, odnosno pruža usluga.

Sva tražena dokumentacija mora biti original ili fotokopija (ne starija od šest mjeseci), ovjerena od nadležnog općinskog organa. **Zahtjevi-prijave uz koje ne bude priložena sva tražena dokumentacija ili fotokopije dokumenata ne budu ovjerene, neće se uzeti u razmatranje.** U postupku podnošenja zahtjeva po Javnom pozivu, Ministarstvo privrede ne snosi nikakve troškove učesnicima.

6. Način prijave:

Zahtjevi-prijave, sa kompletnom dokumentacijom, dostavljaju se putem pošte ili lično na adresu:

Kanton Sarajevo
Ministarstvo privrede
Ulica R.DŽ. Čauševića broj 1.
71000 Sarajevo

(za Javni poziv – podsticajna sredstva za tradicionalne i stare zanate-obrte)

7. Rok za podnošenje zahtjeva - prijava je 30 dana od dana objavljivanja Javnog poziva u Dnevnom listu "Oslobođenje". Prijave primljene nakon isteka roka neće biti razmatrane.

8. Komisija Ministarstva privrede u skladu sa čl. 4. i 5. Uredbe, obrađuje prispjele zahtjeve, a po potrebi, će izvršiti i provjeru podataka na licu mjesta. Na osnovu pismenog izvještaja Komisije, utvrđuje se prijedlog raspodjele sredstava. Na osnovu prijedloga Komisije, Ministarstvo privrede na oglasnoj ploči Kantona Sarajevo objavljuje listu obrtnika - zanatlija, koji ispunjavaju uslove za dobijanje sredstava. Na objavljenu listu može se izjaviti prigovor Ministarstvu privrede, u roku od 15 dana od dana objavljivanja liste. Po okončanju postupka po prigovorima, utvrđuje se i objavljuje konačna lista na oglasnoj ploči Kantona Sarajevo. Na osnovu raspoloživih sredstava, Ministar privrede Kantona Sarajevo, donosi Odluku o raspodjeli sredstava, a odobrena sredstva se uplaćuju na dostavljeni račun obrtnika.

9. Dostavljena dokumentacija po Javnom pozivu se neće vraćati.



web: <http://mp.ks.gov.ba>
e-mail: mp@mp.ks.gov.ba
Tel: + 387 (0) 33 562-121, + 387 (0) 33 562-122
Fax: + 387 (0) 33 562-226
Sarajevo, Reisa Džemaludina Čauševića 1

